

TOUCHER

CENTURION ROLBALKLUB

CENTURION BOWLS CLUB

(www.centurion.bowls-club.co.za)

secretary@centurion-bowls.co.za

NUUSBRIEF / NEWS LETTER

Mei

2023

May

'n Groep klublede was onlangs weer by Lekkerbreek - lees gerus Herman du Plessis se kostelike samevatting van die gebeure daar. Benewens rolbal speel en heerlik kuier, was daar ook die voorreg om weer veldstilte te geniet. Dit het inderdaad veel te sê...

Indeed, silence often speaks louder than words. Let us appreciate and enjoy those precious silences, also on the bowling green.

HOOGTEPUNTE

Die maandelikse worslopie (op 2 Mei) was weer eens 'n groot sukses, onder Tertius van de Venter se bekwame leiding. Elize du Plessis het die worslouere verwerf, met Helena Payne in die tweede plek - baie geluk!

Die opwindende inisiatief van Leon Smith om op elke tweede Woensdagmiddag parespel in 2-4-2-formaat te speel, het nou behoorlik momentum gekry. Daar is tans bykans 60 belangstellendes, en die kommentaar is allerweë baie positief.

Die jongste toevoeging tot die geleedere van die 80-superliga is Koos Slabbert, 'n man van vele begaafdhede: vliegkuns, afslaerkuns, danskuns.... Baie geluk, Koos, en allerbeste wense!



Ons klub het met groot onderskeiding ten opsigte van spyseniering, bane en fasilitering deel gehad aan die Nasionale Damesrolbalkampioenskappe. Maria Steyn en Tillie Kamper het in hierdie baie dun lug gespeel, en deeglik rekenskap van hulself gegee. Baie geluk aan alle betrokkenes!

Die jaarlikse Meyersparktoernooi het plaasgevind op 13 Mei. Tien spanne van elke klub het meegeding. Ons klublede is feestelik onthaal deur die Meyersparkers en spel was baie aangenaam. Helaas het ons klub sommer behoorlik die kous oor die kop gekry. Maar volgende jaar is nog 'n jaar.....

HULDEBLYK: DAAN OPPERMAN



Maandag 17 April 2023. Die eerste wedstryde te Lekkerbreek het begin. Carien, Daan en Zinda speel teen Gerrit, Ernst en David. Daan is in 'n verwoestende bui. Ons speel op die gewraakte baan 6 en sukkel almal met die gras. Nie Daan nie. Hy trek dodelik en maak ons letterlik van die gras. Gedurende die wedstryd ontvang hy 'n telefoonoproep. Iemand verneem na sy welstand. Ons hoor Daan sê dat hy lekker rolbal speel, maar "... ek speel eintlik net om 'n ordentlike dors op te werk". Tipies Daan, en so kon ons hom ook verder geniet en waardeer as die spil van die Lekkerbreeklekkerte. Min wetende....

Donderdag 4 Mei 2023. Bosman stuur 'n laataand boodskap aan die klublede: "Ons klub neem met hartseer afskeid van een van ons groot geeste, Daan Opperman, wat vanaand oorlede is....." Ons is stomgeslaan. Net soos BlouWillem het ons aanvaar dat, soos Tafelberg en die Voortrekkermonument, Daan maar altyd met ons sal wees. Nooit weer sal elkeen van ons hom by die klubhuis kan groet nie. Daardie innemende glimlag as hy jou sien, die ferm handdruk, die opreg-belangstellende vraag: "Hoe gaan dit?". En dan die voorreg om saam of teen hom te speel, elke kop verryk met kommentaar en kwinkslae.

Daar is die afgelope tyd baie oor Daan gesê en geskryf, alles met die grootste waardering. Dit is nie nodig om verder daarop uit te brei nie. Op positiewe noot net twee dinge: Eerstens kan ons almal berusting en troos vind in die wete dat Daan tuisgekom het in die Vaderhuis. Tweedens sal ons saam met Thea gedurig weer blaai in die omvangryke album van kosbare herinneringe aan Daan. En ons sal met dankbaarheid vir mekaar sê: "Waarlik, 'n baie spesiale mens-mens het onder ons gewoon."

Gerrit Kamper

VANWAAR GEHASI?

Helena Payne



Ek is gebore op 11 Februarie 1969 in Alberton en het grootgeword in Stilfontein. Na skool het ek by Eskom (Finansies) begin werk. My laaste 10 jaar in Eskom het ek in 'Group IT' gewerk, op o.a. die betaalstaatstelsel, totdat ek in November 2019 bedank het na 32 jaar, toe my man afgetree het.

Ons was 21 jaar saam, het nie kinders gehad nie maar hy het wel drie kinders uit sy eerste huwelik gehad en ook ses kleinkinders, vyf kleinseuns (o.a. 'n drieling) en een kleindogter.

Ons albei was passievol oor reis en ons sou daarmee voortgegaan het met ons aftrede. Covid-19 het in 2020 ons planne in die wiele gery. In 2021 het my man siek geword en hy is in November 2021 oorlede.

Ek is nie baie sportief nie en sou eerder stokperdjies soos 'scrapbooking', 'art journaling', 'bible journaling', 'mixed media' en 'altered art' beoefen het.

In Julie 2022 het ek met lyndans klasse begin, waar ek Ronell van Zyl ontmoet het. Sy het my aan rolbal bekend gestel. Dis 'n baie lekker sport en ek geniet dit baie.

O ja, die rede vir die GEEL balle:

Ek wou balle gehad het wat ek maklik sou kon uitken tussen die ander balle. Min het ek die nadeel van die geel balle besef: As jou balle oral behalwe naby die kop lê, kan almal dit sien!

LEKKERBREEK 2023

Hierdie weergawe word opgedra aan Oom Daan Opperman, wat twee weke na Lekkerbreek, oorlede is. Lekkerbreek sal nooit weer so lekker wees nie! RIV - Yskaptein!



Sondag 16 April 2023 het uiteindelik aangebreek. Nege en twintig (29) van Centurion se lede het die pad na Lekkerbreek begin. Volgens betroubare bronne het dit bekend geword dat Carien en Rina alreeds Saterdag vertrek en naby 'n dam by Kranskop oornag het, om seker te maak dat hulle betyds is. Hulle het dan ook daar 'n groen parra gekry, wat telkens in selfies saam met hulle verskyn het.

By die Wimpy by Kranskop het almal drupsgewys aangekom so vanaf 12:00 af. David en Ilona het 'n punt daarvan gemaak om daar stil te hou om brandstof in te gooi. Hulle het egter heeltemal verlore geraak tussen al die snacks wat hulle gaan koop het, en weer vertrek sonder om brandstof te kry. Met hulle aankoms by Lekkerbreek, het die Ecosport se petrolliggie hulle herinner waarom hulle eintlik by Kranskop moes stilhou.

Die stofpad na Lekkerbreek het weer baie wild opgedis om na te kyk, onder andere goue blouwildebeeste, rooibokke, springbokke, vlakvarke en verskeie voëlspesies.

Almal het vinnig afgelaai, en sommige het hulle cool boxes vroeër as ander onder beheer gekry, en vinnig was meeste van die Breekgangers onder die lapa met 'n lafenissie. Ernst en Zinda was egter nog besig om hulle 5-ster akkommodasie op te slaan. Te midde van die vrolikheid, noem David toe so terloops aan 'n paar ander manne dat daar 'n slang langs die lapa is.



Met 'n grootse vertoon het die lieflike Pofadder sy verskyning gemaak, rustig oor die plaveisel by ons verby geseil op pad na Magdaleen en Stani se kamer toe, en toe Pens en Pootjies in die plante voor hulle huisie (met die naam Pens en Pootjies) hom/haar gaan tuismaak.

Oom Daan het net daar vir Thea aangevat omdat hy glo dit is haar troetelslang wat sy skelm saamgebring het. Herman se dokter het hom aangeraai om slegs iets sterks te gebruik as hy skrik. Nodeloos om te sê het hy hom gedaan geskrik, en dadelik sy doktersvoorskrif te voorskyn gebring om die skok te absorbeer.

'n Sterk jong boer het te voorskyn gekom en ten aanskoue van die hele groep die ou Pofaddertjie in 'n blik gedruk en verwyder.

John, Conrad en Tertius het onmiddellik die vure aangesteek net om seker te maak dat daar nie nog slange te voorskyn kom nie. Herman het egter weer geskrik toe die droë hout skielik groot vlamme maak.

Vleis is toe gebraai, en saam met die heerlike slaai bedien. Ons het nie pap gekry nie, want verlede jaar het sommige Breekgangers daarteen beswaar gemaak.

Elke persoon is toe gevra om 'n kort stukkie van hulle lewensgeskiedenis te deel met die groep. Party is ongelukkig al so oud, dat hierdie taak nie in 'n kort tydjie gedoen kon word nie.

Gerrit, kompleet met sy Julius Ceasar hooftoisel, wat soos hy dit gestel het, hom laat lyk het soos 'n karakter uit Asterix, het ons vertel hoe hy 'n groep seuns "van 'n wilde natuur" moes leer hoe om sinsontleding te doen, toe hy in sy jong dae ontplooi is as Afrikaansonderwyser in die Wilde Weste.

Heel gepas, was sy jong vroultjie ook 'n onderwyseres, maar sy het die seuns "van 'n wilde natuur" in toom gehou omdat sy ook skyfskiet afgerig het.

Judy het haar naam skoon gemaak, en erken dat sy nie soos wat sy laasjaar berig het, tyd in die gevangenis deurgebring het nie. Sy het wel by Departement Waterwese haar vonnis uitgedien.

Herman was 'n koffiemoffie, Elize is 'n proffie, en hoe hulle ontmoet het, was 'n taai toffie!

Zinda het al die Midmarmyl geswem en die Visrivier staproete gedoen, moontlik uit vrees vir Ernst wat ook met allerhande kaliber gewere gespeel het. Ons vermoed hierdie uiterste uitdagings was onder dwang gedoen.

Tertius het 'n baie diverse vroeë opvoeding gehad, deurdat hy 10 verskillende laerskole bygewoon het. Hoop nie dit het te make met sy kamer se naam nie, wat 'Boerepompie' geheet het nie.

Carin was op skool beter bekend as "die juffrou met die mes", en geen seun "van 'n wilde natuur" sou met haar deurmekaar wou raak nie.

Francis het weereens beaam dat sy die bobaas ore-wasser van die klub is, terwyl Rina die karate meester is.

Maria is van donker Afrika, en Jurg van die Last Outpost in Maritzburg. Jurg het ook tyd in die gevangenis deurgebring.

Stani het almal verbaas met sy verhaal oor die ontstaan van rekenaars en rekenaarskywe in die land, en Magdaleen was wraggieswaar ook 'n skutinstruktrise, wat so tussen die Wiskunde klasgee, self ook 'n koeël kon laat klap.

Oom Daan wou graag meer van homself vertel, maar kon nie, omdat hy "papiere geteken het", wat hom verbied om enige iets oor homself te sê.

Maandagoggend is gepas begin met 'n opening deur Gerrit, deur ons te herinner aan die wonderlike skeppingswerke van ons Vader.



Ontbyt is verslind en almal het na die baan gestroom vir die eerste rolbalwedstryde. Die baan is redelik uitdagend, vergeleke met ons pragtige bane in Centurion. Mens moet baie gras vat aan die een kant, maar daar is nie baie gras om te vat nie. Tweedens vermoed ons dat die baan bo-op 'n tunnel of 'n graf gebou is, en dit die rommelende geluide veroorsaak wanneer mens rol.

Na 'n paar pragtige vertonings, baie wrong biases, en baie touchers, was die eerste wedstryde agter die rug. Iemand beweer oom Daan het 'n oproep ontvang tydens spel, en toe die persoon op die lyn vra in watter kompetisie hy speel, het hy geantwoord dat hy eintlik net speel om 'n dors op te werk.

Almal se dors is daarna geles onder die lapa, en die lafenissies was heerlijk koel danksy die ysgleters wat ons in die drankies kon gooi. Viva Yskaptein!

Die middag was die eerste van die spankompetisies gespeel, en Geel en Blou het as oorwinnaars afgestap teen Groen en Rooi.

Die aand na ete is ons kennis en geheues getoets oor dit wat die vorige aand met ons gedeel is. Die oefeninkie is deur Ernst en Zinda voorberei. Die Meesteres van Straf het daarna al die skuldiges aan oortredings op Maandag gestraf met 'n vuurwatertjie met intense byt.

Soos in die verlede was daar sommige mense wat dit nie as 'n straf beskou het nie, en doelwitte vir die res van die week gestel het om elke aand gestraf te kan word.

Dinsdag is weereens begin met opening, ontbyt en rolbal. Die middag het Groen vasgeval teen Blou, met Magdaleen in 'n verwoestende bui, en Rooi het Geel getroef. Arme Geel het nie 'n kans gestaan nadat Rooi hulle Haka voor die wedstryd gedoen het nie. Die verskriklikste kreet wat nog ooit gehoor is op Lekkerbreek is deur Rooi uitgevoer, en nie net Herman het dié keer geskrik nie. Die plaasbuurtweg het kort daarna verskyn om ondersoek in te stel na die ontstellende krete wat myle ver gehoor kon word.

Geel het egter geantwoord met hulle kreet, waar hulle almal gedreig het dat hulle gatte geskop sou raak.

Die aand is die Meesteres van Straf weer losgelaat, en menige novice-oortreders, maar ook 'n paar gewoonte-misdadigers is "gestraf". Die gewoonte-misdadigers was nie so gelukkig om net 'n "vuurballetjie" te sluk nie, maar moes van Oom Daan se onwettige brousel inneem.

Herman het toe 'n vasvraspeletjie aangebied en die volgende lesse is daaruit geleer:

- Ons mense se geheues is nie meer optimaal funksionierend nie
- Ons mense se gehoorapparate is nie so effektief soos wat ons gedink het nie
- Conrad ken al die liedjies, die kunstenaars en die woorde in die liedjies van enige liedjie wat tussens 1970 en 1990 verskyn het.

Die geel span (met Conrad daarin) het almal se gatte geskop, soos hulle beloof het, en die speletjie gewen.

Tertius het toe met sy bekfluitjie, (of is dit sy boerepompie), losgetrek en heerlike liedjies is saam gesing.

Woensdag is begin met opening, ontbyt en rolbal. Magdaleen het haar verwoestingswerk in die oggend voortgesit, en haar teenstanders wou almal onttrek van die middagwedstryde, en eerder opleiding gaan ontvang. Ongelukkig was Leon nie weer by Lekkerbreek nie.

Blou het die middag vir Rooi oorwin, om sodoende onoorwonne te eindig, ondanks 'n poging van Rooi om met hulle Haka die blou span te ontsenu.

Woensdag aand op Lekkerbreek is Bingo-aand! John was weer die Bingo-Caller, en het hom weereens goed van sy taak gekwyd.

Uit die donker het daar skielik 'n prinses verskyn wat onder toejuiging van die hele groep 'n dans gedoen het wat almal bekoor het. Dit was ons eie Private Dancer, Francis, wat die slag alleen 'n dansitem uitgevoer het. Koos is skynbaar nou te oud (of te skaam) om saam te dans.

Donderdag se hoogtepunt was toe Koos en Francis hulle kamer oopsluit na spel, en op poele bloed afkom. Geen teken van skermutseling was te siene nie, net plasse bloed. Van die verklarings wat na vore gekom het, sluit in:

- Een of ander dier het selfmoord in die kamer gepleeg
- Een of ander dier is in die kamer doodgemaak



- Dracula het in hierdie kamer gerus terwyl ons rolbal gespeel het
- Die bosluis wat vir Louie op die baan aangeval het, het sy vrag in Koos-hulle se kamer gaan afgooi.

Die misterie van die kamer van bloed bly onverklaarbaar, maar die kamer se naam is verander van “Afrikanerhart” na “Soos bloed”.

Van die Breekgangers het die middag ’n wildsrit onderneem, en het wraggies weer ’n pofadder teengekom.

Die aand is afgeskop met die prysuitdeling:

- Jurg en Thea is die kampioene sover dit Wrong Biases aangaan
- Adri is vir die tweede agtereenvolgende jaar die “Toucher Queen”, maar Zinda het met haar radiobeheerde balle baie na aan haar geëndig
- Die wenspan vir die week was Blou: Adri, Zinda, Jurg, Stephan, Koos, Carien en Magdaleen

Die aand is rondom die vuur afgesluit met ’n paar pragtige staaltjies. Ons is weer vergas met Oom Daan se verhaal van die Parmantige Samaritaan, is ook vertel van die dominee wat moes leer waarvan predikante gemaak word in ’n speel-speel kerk in ’n beeskraal, en ons het geluister na die Jan Spies verhaal van die leerling nursie wat almal in die hospitaal se tande deurmekaar laat raak het.

Vrydagoggend is die kamppersoneel deur Jurg bedank, ’n heerlike ontbyt is genuttig, en skielik was Lekkerbreek 2023 verby.

Dis voorwaar ’n voorreg om Lekkerbreek te kon meemaak. Elkeen wat daar was, het dit terdeë geniet, al wys mense dit op verskillende maniere.

Aan elkeen (en dit sluit almal in), wat bygedra het tot ’n wonderlike week, baie dankie. Ek is seker elkeen is weer volgende keer daar! Al was daar baie om voor te skrik, kan ons weer met trots sê: Niemand was stukkend op Lekkerbreek nie!

NS. Ilona en David het dit toe gemaak tot by die vulstasie!

Herman du Plessis

BESTUUR

Sake wat tydens die bestuursvergadering op 12 Mei bespreek is, kom grootliks elders in hierdie uitgawe ter sprake, en/of sal per WhatsApp aan lede deurgegee word.

Die volgende bestuursvergadering vind plaas op 9 Junie 2023.

Belangrike datums vir die dagboeke:

- | | |
|-------------|---|
| 16 Junie | KANSA-dag |
| 22 Julie | Vierhoekige byeenkoms, Bronkhorstspuit. |
| 19 Augustus | Jaarvergadering |
| 20 Augustus | Nomads-toernooi by die klub. |

COMPETITIONS

Club



The men open singles championship winner was Tian Pietersen with runner-up Pieter Pretorius, and the winners of the women drawn trips championship were Dorina du Plessis, Tillie Kamper and Suzaar van Rooyen. Congratulations! The women drawn fours championship is also underway. The men chosen pairs championship has commenced on a round-robin basis. The finalists will emerge in due course.



All of this can only happen thanks to the hard work of Herman du Plessis and Thea Opperman.

BGN and League

On these fronts, a period of rest.

ROLBALONTWIKKELING

Afrigting

Drie potensieële nuwe lede ontvang tans afrigting, met groot dank aan die afrigters, naamlik Leon, Hermien, Bosman, Wim, Ernst en Zinda.

Faults and fault correction (From *Play Bowls* by Simon Botha, Roy Haupt, Graham Mackenzie and Margo Watson)

“Wobbling Bowls”

Those wobbling or pineapple bowls that stagger down the green are an embarrassment to all concerned. If your bowl starts off with a wobble, shiver or turn side over side then there is a problem with your grip. Several things could have happened:

- The middle finger is not on the center of the running surface of the bowl.
- Your pinkie was too tight on the side of the bowl.
- The bowl slipped out of your hand. If this happens frequently then you must look at using a smaller bowl.
- If you twist your wrist on delivery the bowl arrives on the surface sideways on and takes time to straighten out. Keep your hand facing up in the follow through.

Whatever the cause of this condition, the end result is a short bowl, because the wobble takes off too much of the initial energy in its effort to get upright.

Hooking the arm (swinging or swiping)

The reason for hooking the arm is that the arm with the bowl is held in front of the body so that the back swing, to miss the body, will have to swing out and away from the body resulting in an “outside in”. To correct this mistake, make sure the arm is alongside the body, not in front of it; this will produce a pendulum or straight-line delivery. Another reason for hooking is when a player is looking for more weight and uses a twist body to achieve extra speed. To correct this fault, adjust the back swing as described.

LEDESAKE

Verjaarsdae in Mei 2023

2	Pieter Morkel	18	Stani Antonites
2	Wim van der Waals	18	Gert Goosen
10	Alan McGregor		
10	Koos Slabber	22	Anton Deetlefs
13	Wally Smith	24	Corey Marais
15	Jannie de Beer (erelid)	25	Louis Botha
16	Karien Roos	31	Speedy de Wet (vriend)

Verjaarsdae in Junie 2023

1	Emma McCabe	21	Jurg Odendaal
2	Bertie Loots	25	Ben Foord
8	Johan Ehlers	27	Hessie de Lang
11	Hadri Roux	27	Suzette Strydom
13	Frik van Niekerk (vriend)	28	Veronika Bannenberg
15	Herklaas Meyer	28	Maria Steyn
19	Nick Roelofse	29	Johan Lamprecht
20	Leon Smith		

Nuwe lede

Louisa Meyer en Isabel Jacobs. Baie welkom, en geniet!

Lief en leed

Ons innige meegevoel met Thea, kinders en familie met die oorlye van Daan. Soos reeds elders genoem: Ons gaan hom mis. Baie sterkte vir julle.

Christa Roux moes 'n draai in die hospitaal maak. Allerbeste wense vir mooi beterskap!

Speeltye

Dinsdae	-	gemengde spel, skyfies in	8:45 vir 9:00
Donderdae	-	gemengde spel, skyfies in	8:45 vir 9:00
Saterdag	-	gemengde spel, skyfies in	13:45 vir 14:00

Spel word Saterdag in rolbaldrag gespeel en gewone drag vir die ander dae. Vir klubwedstryde en klubfunksies trek ons ook rolbaldrag aan.

Fondse

Ledegeld en ander inbetalings wat betaal word moet as verwysing jou naam en van toon, asook waarvoor jy die betaling maak. Dit sal die Tesouriere se taak aansienlik vergemaklik.

Klubfooie moet verkieslik direk in die klub se bankrekening inbetaal word.

Bankbesonderhede:

Centurion Bowling Cub
ABSA Centurion (Takkode 632005)
Tjekrekeningnr 405 332 3178

Ledegeld, wat BSA/BGN affiliasiefooie insluit, is ten volle betaalbaar teen 30 Junie 2023

<u>Kategorie</u> <u>(Ouderdom op 1 Julie 2022)</u>	<u>Ledegeld</u> <u>(Affiliasie BSA en BGN ingesluit)</u>
Getroud bo 75	R2 400.00
Enkel bo 75	R2 460.00
Getroud 75 en onder	R2 610.00
Enkel 75 en onder	R2 670.00

NB. Getroude persone: Albei moet lede van die klub wees om te kwalifiseer.

Spesiale reëlins vir afbetaling kan met die tesourier gereël word.

Kontak Marieta Fourie by: secretary@centurion-bowls.co.za of
Marieta.fourie@dustaside.com

Boeke

Snuffel gerus in die boekrakke vir iets om te lees en huis toe te neem. Daar is 'n kassie waarin jy R5 per boek moet ingooi. As jy klaar gelees het, bring die boek asseblief terug sodat iemand anders ook die leesgenot daarvan kan hê. Baie dankie, Judy, vir die versorging van ons boeke.

Diensrooster

Aangebring op kennisgewingbord.

GREENS AND FACILITIES

Both greens are still in excellent condition, thanks to the greenkeepers. A special word of thanks to Zinda and Ernst Müller for marking the greens, and to Ernst for his role in the maintenance of the lawnmowers.

KLEINJAN

Môre Ma

Ek is jammer dat ek nou eers antwoord op die vraag wat ma my laasweek gevra het. Ek het eintlik nie 'n antwoord nie, want ek kan nie onthou wat ma gevra het nie.

Maar ewenwel ma, hier gaan dit regtig windmakerig. Ek is deur na die tweede rondte van die gemengde pare. Was dit nie vir my skiep wat so goed gespeel het nie sou ons nie so vêr gewen het nie. Ek self was bo op my kop en het 'n uitstekende game gehad. Ons speel nou aankomste week teen die volgende wenners van hulle rondte. Ek sal vir ma op datum hou. Ma moet my net herhinner.

Ek het gisteraand Tv gekyk en weet ma wie is op die nuus? Een van my ou skool maats wat 'n meisie was. Sy is nou nie meer 'n meisie nie want sy het al kinnars. Ma sou haar nie erken het nie want ma was mos nie in dieselfde skool as ons nie.

Ons klub het weer ons jaarlikse fondsversamelingsdag gehad. Dit is mos waar die komitee goedters aan die spelers van die ander klubs verkoop, en aan ons klub se spelers ook. As jy klaar gespeel het mag jy iets op 'n tafel kies wat jy nie eens weet dat jy dit gekoop het nie. Die wenners kan nie kies nie. Hulle kry net 'n toegeplakte koevert.

Ons dame wat met ons klub se geld werk moet nog sê hoeveel die opbrengste was. Dit vat 'n bietjie tyd want sy is mos nog beenaf soos sy mos geval het. Ma dit val my nou by wat ma my gevra het. Ek weet nog nie of ek oor kersvees verlof gaan kry nie. Dit hang alles af hoeveel mense kinnars het wat in die skool is. Hulle kry voorkeur want hulle wil see toe gaan. Die hoof van ons departement het ook 'n kind wat nog in graad 10 is en sy kan nie eens swem of visvang nie. Ek sal nader aan die tyd weet of sy al kan swem.

Klein Knoffel van oom Grootknoffel het gevra as ek weer plaas toe kom wil hy graag saam kom. Hy was mos die kampioen van bokdrol spoeg by Vanrynsdorp se skou. Hy het gehoor daar is 'n soortgelyke kompetisie in volgende jaar in Doebaai. Ek weet hulle het kamele daar. Knoffel wil kom oefen op die plaas.

Ma ek sien hier by ons is die spietkops nou weer ook besig met hulle blokasies. Oral staan hulle en geld invorder. Ek merk op hulle sê hoe vetter hoe better. Van hulle staan reg voor 'n lorrie soos 'n klip. "Unmovebil"

Ek was giste bietjie by die maall om 'n paar goedjies te gaan koop. Ek neem toe 'n rusplekkie op, op een van die bankies en neem waar soos die mense verby loop. Jare gelede toe die tegnologie nog nie so vêr gevordert was nie het almal met oop gesigte geloop en op gekyk in hulle wandel. Nou is daar sooo baie wat soos muise voor hulle op die grond kyk na hulle se selfone wat so laag voor hulle gehou word. Gelukkig is daar darem nie baie serious ongelukke nie.

Ma weet, nou dat ek so dink, ons het darem baie belangrike persone ook in ons gevangenis gehad. Daar ontsnap sewetien gevangenis uit die gat sonder water tronk uit en hulle word net so skuins in die nuus genoem. Aan die ander kant ontsnap Thabo Bester, nogal met vooraf gereelde vervoer, uit sy blyplek uit en drie ministers praat noual vir 'n week lank op elke nuus op die tv oor hom. Hy het seker 'n baie hoë profiel gehad. Nou wonder ek maar. Ek dink daar was weer 'n slang in die gras gewees. Seker soos hulle sê, nog 'n kader ontplooiing. So van ontplooi gepraat, ek gaan nou dieselfde roete volg en inkruip.

Lekker aand vir ma en sterk staan.

Kleinjan

AND IN CLOSING.....

Ethel: "I hear your husband won the match yesterday afternoon. Did you see him do it?"

Susan: "No, I didn't see the game, but his description lasted all night....."

Stuur asb jou nuuswaardighede aan Gerrit Kamper by kampergd9@gmail.com , praat met hom op die rolbalbaan of in die klubhuis, of skakel met hom by 0731715630.

Besoek gerus ons webwerf by: www.centurion.bowls-club.co.za en ook ons Facebook blad by <https://www.facebook.com/Centurion-Rolbalklub-Bowling-Club>

Neem ook kennis van die Klub se e-posadres: secretary@centurion-bowls.co.za

Wanneer u e-pos aan hierdie adres stuur, sal dit minstens al die lede van die Dagbestuur bereik.